

22. oktober 2013

UKA 2013/69  
Jens Immanuelson

**Ingerlatseqatigiiffiit tamakkiisumik ilaannakoortumilluunniit akiliisartut il.il. eqqar-saatigalugit ingerlatseqatigiiffinnut akileraarutip 1. januar 2015 aallarnerfigalugu 20 %-nut appartinnissaa pillugu kingusinnerpaamik UKA2014-mi inatsisip allangortinnissaanut siunnersuummik saqqummiusseqqullugit Naalackersuisut peqqunegarnissaannik Inatsisartut aalajangiiffigisassaattut siunnersuut.**

(Inatsisartunut ilaasortat Jens B. Frederiksen aamma Andreas Uldum, Demokraatit)

Aalajangiiffigisassatut siunnersuummut Siumumit imatut oqaaseqassaagut.

Siumup tungaviusumik anguniagaraa inuiaqatigiinni aningaasalersugassat pisuussutinik uumassusilinnik uumaatsunillu aningaasanik isertunik tungaveqassasut.

Aamma ingerlatseqatigiiffiit uumassusilinnik uumaatsunillu suliaqarnermikkut ingerlatsisut inuiaqatigiinni anigaasatigut anigaasalersueqataassasut ingerlatseqatigiiffinnut artukkiutaangitsumik.

Tamatta kissaatigaarput nunatsinni ingerlatseqatigiiffiit suliassaqarnermikkut tungavissaat pitsaasumik aqutissiuukkutsigu taava tamatuma malitsigisassaasa ilagigaat siunissami aamma ingerlatseqatigiiffiit akileraarutaasa appartikkiartuaarneqarnissaat.

Inuiaqatigiinnimi anigaasalersugassavut akissaqartinnngisavullu akissaqartilerumallugit aqutissiuunneqarnissaat Siumumi assut pingaartitaraarput maannakkut ingerlatseqatigiiffinnut akileraarut suliffeqarfinnut annernartumik kinguneqarsimangilaq.

Siumumi isumaqarpugut ingerlatseqatigiiffiit akileraarutaata 30 %-iusup 20 %-imut appartinnissaa maannakkut piffissaangitsog.

Namminiilivinnissatsinnut akisussaaffiit naalagaaffimmit suli tigunngisagut 30-it missaaniit-tut ukiuni aggersuni akissaqartinniartussaavagut ineriartortitsinermi pisariaqartitatta maannakkulli tulleriaarinitsinni suli akissaqartinnngisatta saniatigut ingerlatseqatigiiffinnut akileraarut appartikkutsigu aningaasat annaasassat allatigut sipaaruteqarnikkut aasussangusagatsigut soorluttaaq tamanna Naalackersuisut akissuteqarneranni ersersinneqartoq.

Siumut isumaqarpoq inuiaqatigiit ineriartortinneqarneranni aqqissuusseqqinnerillu anner-tuut aallartisaleruttortut ingerlatseqatigiiffiit akileraarutaat appartinnagu annaasassat asser-

suutigalugu aatsitassarsiornikkut ingerlatseqatigiiffiit aallarereernerini pisinnaasoq aningaasatigut isaatitsilerutta annaasassallu sipaarniuteqarneq aqutigiginagu taartissaqartil-rutsigit, tamannami qularutigisariaqanngilaq inatsisitigut nunatta anigaasalersuiffigissallugu nalorninanngitsumik tunngavissiorneratigut soqutiginninneq aqutissiuusinnaavarput, nalunngilarpummi nunarput avatitsinnit soqutigineqaleriartuinnartoq pingaartumik aatsitasarsiorneq eqqarsaatigalugu, taamaattumillu ingerlatseqatigiiffiit akileraarutaat maannak-kut appartissallugu piffissaanngitsoq Siumut isumaqarpoq.

Demokraatit aaliangiiffigisassatut siunnersuutiminni tungavilersuutiminni ima allapput: "Pif-fissaq qaninnerusoq eqqarsaatigalugu suliffiit amerlanerusut pilersinneqassapput taamaa-siornikkullu inuiaqatigiit aningaasarsiornerat tamakkiisoq pitsangorsarneqassaaq."

Siumut isumaqarpoq politikkikkut ersarissumik iliuuseqarneq aqutissaasoq siunissamut qanittumut ungasinnerusorlu eqqarsaatigalugu nunatsinnut anigaasaleerusussuseqartit-silernissaq anguniarutsigu pingaartumik aatsitassarsiorneq eqqarsaatigalugu ersarissumik politikkikkut isummernikkut ingerlatseqatigiiffiit nunatsinnut soqutiginnittut aamma eqqar-saatigalugit, iliuuseqarani neriuutigiinnarlugu.

Soqutiginninneq annertusiumaartoq aningaasalersuinerit allatigut sipaarniuteqarnikkut matussusertaqattaarnissaannut nalunagu akissaqartinnatigut aqutissaanngillat.

Ersarissunik aalajangertarnerit aatsaat iliuuseqarusussuseqalersitsisartut Siumut isuma-qarpoq taamaattumik nunatsinni inuussutissarsiornikkut periarfissanik atorluaaneq pisuus-sutit uumassusillit uumaatsullu eqqarsaatigalugit pitsangorsarneqartuartariaqartut Siumut isumaqarpoq.

Taamatut oqaaseqarluta siunnersuut Siumumiit akuersaanngilarput.